

Lu Rusciu Nosciu

Il Suono del Salento

LU RUSCIU NOSCIU

Stasira alla curte sta ne sciamu
ca culli caruseddhi scia ballamu
ca nci su quiddhi te Lu Rusciu Nosciu
e tarantate te Lu Rusciu Nosciu.

M'hannu tittu ca la vagnona è beddha
ahi mamma ! nc'è puru na caruseddha
nu ciucciu longu e nu 'mposimatu
e naddhu ca me pare scapiddhisciatu.

Rit. Lu Rusciu Nosciu nui ne chiamamu
e addhunca sciamu nui sunamu
e se vitimu ca tutti ballati
ulimu puru cu cantati.

E mo ca quai simu rivate
l'anche nosce su tutte scazzicate
e nci su tanti caruseddhi
ahi mamma! Su tutti quanti beddhi.

Cummare ieu va nzurtu dhu caruseddhu
ca secondu mie è lu chiu beddhu
anche longhe e larghe spaddhe
me fazzu nnanzi ieu prima te l'addhe.

Rit. Lu Rusciu Nosciu

A vagnona culle mani e nacchere sona
mentre cu dha uce sta canzune 'ntona
a caruseddha ancorta ancorta
cullu tamburreddhu u ritmu porta.

U ciucciu longu canta propriu bonu
ca te ddha chitarra face cu esse nu sonu
u 'mposimatu sta lu cumpagna
nu se ne corge ca sta lu rravagna.

Rit. Lu Rusciu Nosciu.....

E' rimastu lu scapiddhisciatu
ca tu tamburreddhu sa nnamuratu
e a tutti quai n'ae ncucchiati
sunati 'ncora nu bbe fermati.

Rit. Lu Rusciu Nosciu nui ne chiamamu
e addhunca sciamu nui sunamu
e se vitimu ca tutti ballati
ulimu puru cu cantati.

Lu Rusciu Nosciu quandu lu santiti
bballati tutti quanti e nu timiti
ca te cantare nui nu ne straccamu
se nc'è la uce nu ne fermamu !

Li vagnoni te cantare hannu spicciatu
lu tiempu cu ne sciamu ete 'rrivatu
e na canzune vene 'ntunata
Lu Rusciu Nosciu l'haie cantata